

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", br: 49/06 i 51/09), čl. 10. i 68. Statuta Općine Centar Sarajevo – Prečišćeni tekst ("Službene novine Kantona Sarajevo", broj 23/04) i člana 87. Poslovnika Općinskog vijeća Centar Sarajevo („Službene novine Kantona Sarajevo", br. 23/04-prečišćeni tekst, 11/13, 13/17, 24/19, 31/19, 29/20, 2/24 i 11/24), a po službenom dopisu Službe za stambene i komunalne poslove Općine Centar Sarajevo broj: 03-19-78/25 od 01.07.2025.godine, Općinsko vijeće Centar Sarajevo je, na 9.redovnoj sjednici održanoj 31.07.2025. godine donijelo

## **ZAKLJUČAK**

### **o ispravci objave Odluke o organizaciji sistema parkiranja na javnim parking površinama Općine Centar Sarajevo, u Službenim novinama Kantona Sarajevo", broj 6/25**

#### **Član 1.**

U „Službenim novinama Kantona Sarajevo" broj 6/25, objavljen je netačan tekst Odluke o organizaciji sistema parkiranja na javnim parking površinama Općine Centar Sarajevo, koji ne odgovara izvorniku Odluke, koju je usvojilo Općinsko vijeće Centar Sarajevo na 3. redovnoj sjednici Općinskog vijeća održanoj 30.01.2025. godine, a koja je stupila na snagu dana 07.02.2025.godine.

#### **Član 2.**

Tekst Odluke o organizaciji sistema parkiranja na javnim parking površinama Općine Centar Sarajevo, koji je usvojen na 3. redovnoj sjednici Općinskog vijeća Centar Sarajevo, održanoj 30.01.2025. godine, glasi:

Na osnovu člana 8. i 13. Zakona o principima lokalne samouprave u Federaciji Bosne i Hercegovine ("Službene novine FBiH", br. 49/06 i 51/09), člana 5. stav (3) i (4) Uredbe o organizaciji parkiranja, javnim parking površinama, parking zonama, izgradnji novih parkinga i organizaciji jedinstvenog sistema naplate parkiranja („Službene novine Kantona Sarajevo", broj: 34/23), i člana 10. i 68. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04), Općinsko vijeće Centar Sarajevo je, na 3.redovnoj sjednici, održanoj dana 30.01.2025.godine, donijelo

## **O D L U K U**

### **O ORGANIZACIJI SISTEMA PARKIRANJA NA JAVNIM PARKING POVRŠINAMA OPĆINE CENTAR SARAJEVO**

#### **I OPĆE ODREDBE**

##### **Član 1. (Predmet)**

Ovom odlukom uređuju se organizacije parkiranja na javnim površinama namijenjenim isključivo za parkiranje motornih vozila u nadležnosti Općine Centar Sarajevo, javnim parkinzima uspostavljenim na zemljištu u vlasništvu Općine Centar Sarajevo ( u daljem tekstu: Općina), uslovi i način korištenja parkinga i parking mjesta, vrste parking karte i način njihovog korištenja, međusobni odnosi Općine, davaoca komunalne usluge i korisnika parkinga, kontrola korištenja parkinga, nadzor i druga pitanja koja se odnose na oblast parkiranja unutar naselja.

## **Član 2.** **(Značenje pojmova)**

Izrazi koji se koriste u ovoj odluci imaju sljedeće značenje:

- a) Javnim parkiralištem se smatra površina na lokalnim, nekategorisanim cestama i javnim površinama u naseljima ili površina namijenjena i saobraćajnom signalizacijom označena isključivo za zaustavljanje i parkiranje vozila u vlasništvu Općine Centar Sarajevo,
- b) Upravitelj – Općina Centar Sarajevo nadležna je za uspostavu, kontrolu, naplatu i održavanje parking prostora, putem odabranog davaoca komunalne usluge,
- c) Davalac komunalne usluge - pravno lice registrovano za ovu vrstu djelatnosti na osnovu zaključenog ugovora sa Općinom odabran putem javnog poziva ili odlukom Općinskog vijeća Centar Sarajevo ukoliko se radi o pravnom licu čiji je osnivač Općina,
- d) Korisnik usluge - vozač koji parkira vozilo na parking mjesto, odnosno druga osoba za koju je ovom odlukom određeno da se smatra korisnikom,
- e) Parking mjesto - dio javne parking površine namijenjeno parkiranju jednog motornog vozila i označeno odgovarajućom saobraćajnom signalizacijom,
- e) Parking zona – parking područje na kojoj se vrši naplata parkiranja, u skladu sa zonama određenim odlukom Vlade Kantona Sarajevo,
- f) Povlaštena parking karta -parking karta po povoljnijim cijenama koja se može izdati fizičkim osobama koje imaju prebivalište, boravište ili dokaz o vlasništvu stana, fizičkim osobama koje obavljaju samostalnu privrednu djelatnost i koje imaju sjedište ili koriste poslovni prostor i pravnim osobama koje imaju sjedište ili koriste poslovni prostor u ulicama u kojima postoji parking sa naplatom,
- g) Rezervisana parking mjesta - su prostori rezervisani od strane korisnika (državne institucije, diplomatska predstavništva, institucije čiji je rad od općeg interesa, i organizatori manifestacija i sličnih skupova) kod davaoca usluge.
- h) Parking mjesta za vozila koje koristi osoba sa invaliditetom - posebno obilježeno parking mjesto rezervisano za parkiranje vozila osoba sa invaliditetom koje na vozilu imaju istaknut važeći međunarodni znak pristupačnosti.

## **II ORGANIZACIJA SISTEMA JAVNIH PARKING POVRŠINA**

### **Član 3.** **(Formiranje i uspostavljanje parking prostora)**

- (1) Formiranje parking prostora i mjesta će se vršiti u skladu sa Programom parkiranja na ulicama koje će definisati Upravitelj, na koji saglasnost daje Ministarstvo saobraćaja Kantona Sarajevo, a koje donosi Općinsko vijeće Centar Sarajevo.
- (2) Javne parking površine moraju biti označene saobraćajnom signalizacijom u skladu sa Zakonom o osnovama bezbjednosti saobraćaja na cestama u Bosni i Hercegovini („Službeni glasnik BiH“, br. 06/06, 44/07, 84/09 i 48/10) i Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlaštena osoba („Službeni glasnik BiH“, broj: 16/07 i 61/07).
- (3) U skladu sa Odlukom o zonama javnih parkinga koju je donijela Vlada Kantona Sarajevo određene su i obilježene bojama tri parking zone koje će se primjenjivati (crvena, žuta i zelena boja) i za parkinge unutar naselja u nadležnosti Općine (plava boja).
- (4) Uređenje i obilježavanje javnih parkirališta na kojima se naplaćuje parkiranje vrši Upravitelj istih.

#### **Član 4.** **(Oznake i sadržaj parking mjesta)**

(1) Javne parking površine na kojima se naplaćuje parkiranje, moraju imati uređenu podlogu i horizontalnu i vertikalnu signalizaciju, a mogu imati i druge sadržaje (parkomati, automatske rampe i punionice za električna vozila) u skladu sa propisima iz člana 3. ove odluke.

(2) Vertikalna saobraćajna signalizacija (na vidnom mjestu istaknuto obavještenje na saobraćajnim tablama) sadrži:

- a) oznaku "P" (parkiralište) - skraćeni naziv parkirališta,
- b) broj parking zone,
- c) upozorenje o obaveznoj naplati usluga parkiranja,
- d) cijena usluga javnih parkirališta,
- e) upozorenje da će vozila parkirana na nedozvoljenim (neobilježenim) mjestima biti blokirana uređajem za blokiranje točkova "liscama",
- f) radno vrijeme naplate usluga parkiranja.

(3) Parkiranjem vozila na javnoj parking površini smatra se da korisnik zaključuje ugovor o korištenju javne parking površine sa davaocem komunalne usluge prihvajući uslove propisane ovom odlukom.

### **II USLOVI I NAČIN ODRŽAVANJA I KORIŠTENJA JAVNIH PARKING POVRŠINA**

#### **Član 5.** **(Obaveze davaoca komunalne usluge)**

(1) Davalac komunalne usluge vrši naplatu, kontrolu, održavanje, uređenje, čišćenje parkinga i obnovu saobraćajne signalizacije na javnim parkinzima kao i postavljanje nove saobraćajne signalizacije prema Pravilniku o saobraćajnim znakovima i signalizaciji na cestama, načinu obilježavanju radova i prepreka na cesti, i znakova kojima učesnicima u saobraćaju daje ovlaštena osoba (Službeni glasnik BiH broj 16/07, 61/07).

(2) Održavanje, uređenje i čišćenje podrazumijeva: horizontalnu i vertikalnu signalizaciju, održavanje slivnih rešetaka (poklopaca i šahtova), uređenje površina za parkiranje, redovno održavanje higijene, uklanjanje snijega, poledice i drugih elemenata koji ometaju kretanje i parkiranje.

#### **Član 6.** **(Obaveze korisnika)**

(1) Za korištenje javnih parkinga korisnik mora imati važeću parking kartu.

(2) Parking kartā je isprava kojom korisnik parkinga dokazuje da je platio odgovarajuću naknadu prema zoni parkiranja, te da se na parkingu zadržava u okviru dopuštenog vremena.

(3) Korisnik parkinga dužan je parking kartu kupiti najkasnije u roku od 10 minuta od parkiranja vozila i propisno istaknuti na vidno mjesto sa unutrašnje strane prednjeg vjetrobranskog stakla tako da kontrolor davaoca komunalne usluge može provjeriti njenu valjanost.

(4) Ako korisnik javnog parkinga ne izvrši kupovinu parking karte iz stava (3) ovog člana ili je istakne tako da se ne može provjeriti njena valjanost, sankcionisat će se po odredbama ove odluke.

## **Član 7.** **(Povreda uslova o korištenju)**

(1) Korisnik javnog parking prostora čini povredu uslova propisanih ovom odlukom ako:

- a) ne kupi ili ne istakne parking kartu na vidljivo mjesto sa unutrašnje strane vjetrobranskog stakla vozila nakon parkiranja ili ne izvrši uplatu na jedan od ponuđenih načina plaćanja usluge parkiranja u roku od 10 minuta,
- b) koristi parking kartu koja ne odgovara zoni parkiranja,
- c) korisnik parkiranja koristi povlaštenu parking kartu koja nije u skladu sa ovom odlukom,
- d) svojim položajem parkiranja zauzima više od jednog parking mjesta,
- e) parkira ili zaustavi vozilo na parking mjestima predviđenim za osobe sa invaliditetom, te parkira i zaustavi vozilo na rezervisanim parking mjestima,
- f) obavlja usluge popravke, pranje vozila ili bilo koju drugu radnju koja utiče na nesmetano funkcionisanje parkirališta kao komunalne djelatnosti od općeg značaja,
- g) ostavi neispravno ili havarisano vozilo na parkiralištu.

(2) Ako korisnik parkiranja učini bilo koju navedenu radnju iz stava (1) ovog člana, sankcioniše se izdavanjem naloga za postavljanje naprave za blokiranje točkova od strane davaoca komunalne usluge i plaćanjem odgovarajuće novčane kazne.

(3) Ukoliko korisnik ne izvrši uplatu kazne u roku od dva sata od trenutka izdavanja naloga za uplatu kazne, vozilo će se ukloniti specijalnim vozilom „pauk“ na trošak korisnika.

(4) Poslove blokiranja i deblokiranja vozila će vršiti ovlaštena lica davaoca komunalne usluge.

## **Član 8.** **(Parking karta)**

(1) Parking karta se izdaje na papiru, u obliku naljepnice ili u drugoj formi.

(2) Parking karta sadrži: evidencijski broj parkinga, logo Upravitelja, zonu, naziv ulice, datum i vrijeme uplate, vrijeme važenja i druge tehničke elemente po potrebi u svrhu unapređenja sistema.

(3) Parking karta se može izdati i kao potvrda u elektronskoj formi, ukoliko se za to steknu uslovi.

(4) Izrada i štampanje satnih, dnevnih, mjesečnih, polugodišnjih i godišnjih, rezervisanih i povlaštenih parking karata je u nadležnosti davaoca komunalne usluge.

(5) Dnevna parking karta za parkiranje na javnom parking u sa naplatom izdaje se kao karta za određenu parking zonu.

(6) Vozila hitne medicinske pomoći, policije i vatrogasna vozila, kada u toku intervencije koriste javna parkirališta, ne plaćaju naknadu za parkiranje.

(7) U izuzetnim slučajevima naplata parkiranja može se vršiti ručno pomoću ovjerenih blok karti.

## **Član 9.** **(Mjesečna, polugodišnja i godišnja parking karta)**

(1) Pravo na kupovinu mjesečne, polugodišnje i godišnje parking karte imaju sve fizičke i pravne osobe u skladu sa ovom odlukom.

(2) Kupovina karte vrši se kod Davaoca komunalne usluge.

(3) Vozilo s mjesečnom, polugodišnjom i godišnjom parking kartom može biti parkirano na svim javnim parkiralištima u nadležnosti Upravitelja na kojima se vrši naplata, unutar zone za koju je parking karta izdata i u nižim zonama, a u periodu važenja parking karte.

## **Član 10.**

### **(Povlaštena parking karta)**

(1) Pravo na povlaštenu parking kartu za korištenje parkinga koji su u nadležnosti Upravitelja imaju:

- a) Fizička osoba (stanar) koja ima prebivalište, boravište ili dokaz o vlasništvu stana u ulici u kojoj postoji parking sa naplatom,
  - b) Pravna osoba koja ima sjedište ili koristi poslovni prostor u ulici u kojoj postoji parking sa naplatom,
  - c) Fizička osoba koja obavlja samostalnu privrednu djelatnost koja ima sjedište ili koristi poslovni prostor u ulici u kojoj postoji parking sa naplatom,
- (2) Povlaštena parking karta vrijedi unutar parking zone za koju je izdata ili niže zone.

## **Član 11.**

### **(Ostvarivanje prava na povlaštenu parking kartu)**

(1) Osobe iz prethodnog člana, pravo na povlaštenu parking kartu ostvaruju kod davaoca komunalne usluge.

(2) Fizička osoba radi izdavanja povlaštene parking karte, dužna je na dati na uvid: CIPS ovu prijavnicu prebivališta ili dokaz boravišta, ili dokaz o vlasništvu stana ne stariji od 6 mjeseci i fotokopiju potvrde o registraciji vozila ili ugovor o leasingu.

(3) Pravna osoba daje na uvid: fotokopiju akta o registracije preduzeća i fotokopiju o registraciji vozila ili ugovor o leasingu.

(4) Fizička osoba, koja obavlja samostalnu djelatnost, daje na uvid: fotokopiju rješenja o osnivanju samostalne privredne djelatnosti i fotokopiju potvrde o registraciji vozila ili ugovor o leasingu.

## **Član 12.**

### **(Zamjena povlaštene parking karte)**

(1) Ukoliko korisnik povlaštene parking karte za vrijeme njenog važenja izgubi ili ošteti istu, davalac komunalne usluge će na zahtjev korisnika, izdat novu povlaštenu parking kartu sa rokom važenja prethodno izdate parking karte.

(2) Izdavanje nove izgubljene ili oštećene povlaštene karte u skladu sa prethodnim stavom, moguće je jedanput izvršiti besplatno u periodu važenja iste, dok će svako naredno izdavanje biti naplaćeno. Iznos ponovnog izdavanja povlaštene karte u nadležnosti je odabranog davaoca komunalne usluge.

## **Član 13.**

### **(Parking za osobe sa invaliditetom)**

(1) Na javnim parkinzima sa naplatom na posebno obilježenim mjestima rezervisanim za parkiranje vozila osoba sa invaliditetom, osobe sa invaliditetom koje na vozilu imaju istaknut važeći međunarodni znak pristupačnosti, imaju pravo parkirati bez plaćanja naknade.

(2) Osobe sa invaliditetom vozilo sa međunarodnim znakom pristupačnosti mogu parkirati na parking mjestu sa naplatom koja nisu posebno obilježena za osobe sa invaliditetom najduže dva sata, nakon čega su dužni platiti naknadu.

(3) Za parkiranje vozila koja koriste osobe sa invaliditetom, osigurava se najmanje dva parking mjesta unutar zone, na kojima se ne naplaćuje naknada za parkiranje.

(4) Osobe sa invaliditetom koje posjeduju važeći znak pristupačnosti mogu parkirati na parkinzima sa rampom, na kojim postoje obilježena parking mjesta za osobe sa invaliditetom i ukoliko je na ulazu u parking postavljena saobraćajna signalizacija koja ukazuje na mogućnost parkiranja osoba sa invaliditetom.

(5) Vozilo parkirano na mjestu za parkiranje vozila koja koriste osobe sa invaliditetom, a koje nema vidno istaknut znak pristupačnosti, bit će blokirano uređajem za blokiranje točkova - "liscama", a troškove deblokade snosi vlasnik vozila.

**Član 14.**  
**(Privremeno rezervisana parking mjesta)**

(1) Upravitelj putem nadležne općinske službe može odobriti uz propisanu naknadu, rezervaciju parking mjesta u slučaju održavanja manifestacija do sedam dana.

(2) Broj privremeno rezervisanih parking mjesta u jednoj parking zoni može biti najviše 5% od ukupnog broja parking mjesta u toj parking zoni.

**Član 15.**  
**(Radno vrijeme)**

(1) Radno vrijeme javnih parkinga je od 00-24 sata .

(2) Naplata parkiranja na javnim parkinzima se vrši po zonama: a) u "I" zoni u vremenu od 07-22 sata, ponedjeljak-subota, b) u "II" zoni u vremenu od 07-20 sati, ponedjeljak-subota, c) u "III" zoni vremensko ograničenje parkiranja je max. 3h u vremenu od 07-22 sata, ponedjeljak-subota.

(3) Na javnim parkinzima u "I", "II" i "III" zoni ne vrši se naplata nedjeljom, državnim praznicima i prvi dan vjerskih praznika.

(4) Naplata parkiranja na parkinzima sa automatskom naplatom (rampe) i garažama vrši se u periodu ponedjeljak-nedjelja od 00-24 sata.

(5) Izuzetno, Upravitelj može, zbog objektivnih okolnosti odrediti i drugačije radno vrijeme koje mora biti istaknuto na javnim parkiralištima za koje se primjenjuje.

**Član 16.**  
**(Zabranjene radnje)**

(1) Na javnim parkinzima sa naplatom zabranjeno je:

- a) zauzimanje parking mjesta putem ograđivanja (parking prepreke, ograde i razni predmeti koji fizički ometaju parkiranje),
- b) neovlašteno parkiranje na rezervisanim parking mjestima,
- c) neovlašteno parkiranje na označenim parking mjestima za osobe sa invaliditetom bez važećeg međunarodnog znaka pristupačnosti,
- d) plakiranje, crtanje i pisanje grafita na parkirališnoj opremi i saobraćajnoj signalizaciji na parkinzima.

(2) Za učinjeni prekršaj iz stava (1) tačka b) i c) ovog člana, vozilo korisnika parkinga bit će uklonjeno specijalnim vozilom „pauk“.

(3) Korisnicima javnih parkirališta i drugim licima je zabranjeno blokiranje, odnosno oštećenje automata za naplatu parkiranja (ubacivanjem neodgovarajućih kovanica ili drugih materijala i vršenje bilo kakvih radnji kojim se vrši oštećenje automata za naplatu parkiranja).

**Član 17.**  
**(Odgovornost)**

Upravitelj na javnim parkiralištima na kojima se naplaćuje parkiranje ne snosi odgovornost u slučaju otuđenja motornog vozila ili nastanka štete na istim, a što će biti utvrđeno ugovorom sa davaocem komunalne usluge.

**IV KONTROLA PARKIRANJA NA JAVNIM PARKING POVRŠINAMA**

**Član 18.**  
**(Kontrola parkiranja na javnim parkinzima)**

(1) Kontrolu nad svim parkiranim vozilima na javnim parking površinama sa naplatom obavlja kontrolor koji je zaposlenik kod davaoca komunalne usluge.

(2) Naplatu parkiranja i kontrolu naplate parkiranja, obavljat će ovlaštena lica davaoca komunalne usluge (kontrolori) koji moraju biti jednoobrazno odjeveni, imati

identifikacione legitimacije na kojima je ispisan naziv davaoca usluge, serijski broj legitimacije, ime i prezime i fotografiju radnika.

(3) Kontrolori koriste odgovarajuću tehničku opremu koja omogućuje evidentiranje: mjesta, vremena parkiranja, i registarske oznake vozila (u slučaju elektronske naplate).

(4) Davalac komunalne usluge je dužan propisati izgled legitimacije i službenih odijela kontrolora parkiranja internim aktom na koji Općina daje saglasnost kao Upravitelj.

## **V DIO PETI – KAZNE NE ODREDBE**

### **Član 19. (Visina kazne)**

(1) Novčanom kaznom u iznosu od 50,00 KM do 500,00 KM kaznit će se lice koje postupi suprotno odredbi člana 7. stav (1), ove odluke.

(2) Novčanom kaznom u iznosu od 200,00 KM do 500,00 KM kaznit će se vozač ili vlasnik motornog vozila za neplaćanje naknade iz člana 6. odluke.

(3) Novčanom kaznom u iznosu od 500,00 KM do 1.000,00 KM kaznit će se lice koje učini neku od zabranjenih radnji iz člana 16. ove odluke.

(4) Novčanom kaznom u iznosu od 1.000,00 – 5.000,00 KM, kaznit će se lice koje ošteti automat za naplatu parkiranja, u zavisnosti od oštećenja.

### **Član 20. (Prekršajni nalog)**

(1) Prekršajni nalog za plaćanje novčane kazne izdaje nadležni inspektor Općine, koji se uručuje lično ili se pričvršćuje ispod brisača vjetrobranskog stakla ili se dostavlja putem pošte.

(2) Dostavljanje prekršajnog naloga na način iz stava (1) ovog člana smatra se urednim te naknadno oštećenje ili uništenje naloga ne utiče na valjanost dostavljanja i ne odgađa plaćanje novčane kazne.

(3) Komunalni redar Općine je dužan da po ličnom saznanju ili na poziv ovlaštenog lica davaoca usluge izvrši uviđaj na licu mjesta o uočenim nepravilnostima odnosno povredama odredbi ove odluke, o istom sačini zapisnik sa svim relevantnim podacima i isti dostavi općinskom inspektoru radi izdavanja prekršajnog naloga.

(4) Korisnik parkirališta dužan je postupiti po primljenom prekršajnom nalogu i platiti novčanu kaznu u roku od osam dana na način naznačen u prekršajnom nalogu.

(5) Ako korisnik parkirališta ne postupi u roku po prekršajnom nalogu izdanom u skladu sa stavom (4) ovog člana, odnosno ako u naznačenom roku ne prihvati odgovornost ili ne zatraži sudsko odlučivanje smatrat će se da je okrivljenik prihvatio odgovornost propuštanjem i prekršajni nalog postaje konačan i izvršan, a dodatna taksa od 20,00 KM bit će dodana sumi koju duguje, u skladu sa članom 58. stav (2) Zakona o prekršajima Federacije Bosne i Hercegovine („Službene novine F BiH“, broj: 63/14).

### **Član 21. (Registar novčanih kazni)**

(1) Novčane kazne iz člana 19. ove odluke upisat će se u Registar novčanih kazni, u skladu sa članom 3. stav (1) tač. 1) alineja c) i člana 102. Zakona o prekršajima Federacije Bosne i Hercegovine.

### **Član 22. (Unapređenje javnog parkiranja)**

(1) Sredstva prikupljena po osnovu naplate parkiranja su namjenski prihod i ista će se utrošiti na investiciono-tehničko održavanje cesta i parking prostora u nadležnosti Općine.

(2) Opremanje i obim uređenja parkirališta kojima upravlja ili su u vlasništvu Općine vrši se na osnovu usvojenog Programa parkiranja na području Općine Centar Sarajevo.

(3) Program parkiranja na području Općine Centar uputiti će se Općinskom vijeću na razmatranje najkasnije u roku od 90 dana od dana usvajanja ove Odluke.

(4) U roku od 30 dana od dana stupanja na snagu ove odluke, Općina će zaključiti ugovor sa davaocem usluge kojim će se definisati namjena i način korištenja sredstava, dinamika i način isplate odnosno prijenos sredstava, obaveza povrata sredstava u budžet Općine u slučaju nenamjenskog utroška istih, izvještavanje te kontrola i nadzor nad namjenskim utroškom sredstava.

## **VI NADZOR**

### **Član 23.**

#### **(Nadzor nad provođenjem ove odluke)**

(1) Nadzor nad provođenjem ove odluke vrši nadležna služba za komunalne poslove.

(2) Inspekcijski nadzor nad provođenjem ove odluke vrši općinska inspekcija.

## **VII PRIJELAZNE I ZAVRŠNE ODREDBE**

### **Član 24.**

#### **(Prestanak važenja ranije donesene Odluke)**

Danom stupanja na snagu ove odluke prestaje da važi Odluka o javnim parkiralištima na području Općine Centar („Službene novine Kantona Sarajevo“, broj 46/20).

### **Član 25.**

#### **(Stupanje na snagu)**

Ova odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će se objaviti u "Službenim novinama Kantona Sarajevo" i na web stranici Općine Centar Sarajevo.

Predsjedavajući općinskog vijeća  
Benjamin Isović

Broj,01-19-480/25  
Sarajevo,30.01.2025.godine

### **Član 3.**

Zaključak sa ispravnim tekstom odluke će biti objavljen na oglasnoj ploči Općine Centar Sarajevo i "Službenim novinama Kantona Sarajevo".

Broj: 01-19-4409/25  
Sarajevo,31.07.2025. godine

**Zamjenica Predsjedavajućeg  
Općinskog vijeća**

Sara Arslanagić

Zaključak je objavljen na oglasnoj ploči dana

**05-08-2025**

